

Pengedryss til friluftstiltak

Takka vere Gjensidigestiftelsen vert det bygt Tuftepark ved Volda stadion og lagt ny sand på sandvolleyballbanene på Årneset.

Onsdag føremiddag fekk Friluftsföreninga i Volda og KFUM volleyball den glade budskapet i form av to solide sjekkar frå Ketil Jarl Halse. Irene Krumsvik og Terje Flåm frå KFUM volleyball tok imot 171.363 kroner, og Cecilie Åmås frå Friluftsföreninga i Volda fekk 300.000 kroner.

Ny sand

Sandvolleyballbanene på Årneset er ni år gamle, og svært mykje brukt. I tillegg til at volleyballgruppa held treningar og konkurransar der, vert banene nytta av voldingar, tilreisande og asylsøkjjarar. Volleyballnetta heng oppe frå mai til utpå hausten.

– I tillegg til stor bruk, opplever banene slitasje av vær og vind. Mykje av spesialsanden som vi kjøpte i 2006 er no vekk, og banene treng påfyll. Sidan banene vert nytta til konkurransar, må vi kjøpe dyr spesialsand. Vi kan ikkje berre hente sand frå næraste strand, fortel Krumsvik. Spesialsanden er berre å få kjøpt i Hønefoss, og volleyballgruppa treng mange lastebillass. Totalt skal det fyllast på 125 kubikk sand. Krumsvik er svært takksam for at laget fekk tildelt heile søknadssummen, og gler seg til å kome i gang med utbetningsarbeidet.

Tuftepark

Eit lågterskel treningstilbod for folk i alle aldrar har vore etterlengta av fleire i Volda, og no blir det ein realitet. Midlane til Friluftsföreninga skal gå til bygging av ein Tuftepark. Parken er tenkt plassert i området mellom Midtun og stadion, like ved brua over elva.



* Store summer: Irene Krumsvik og Terje Flåm frå KFUM, Ketil Jarl Halse frå Gjensidigestiftelsen og Cecilie Åmås frå Friluftsföreninga i Volda.

– Dette skal vere eit gratis lågterskeltilbod som er lett tilgjengeleg for alle. Her kan barn og vaksne trene saman, og finne høvelege utfordringar. Parken vil vere open heile døgnet, og ligg inntil den mykje brukte turvegen mellom Årneset og stadion, fortel Åmås, som er takksam for at dei også fekk innvilga heile søknadsbeløpet. Tufteparken er kostnadsrekna til 750.000 kroner, og mykje arbeid skal gjerast på dagnad. Ifølgje Åmås er det stor interesse for ein slik park i Volda kommune, og kommunen søkte sjølv Krefteforeninga om midlar til ein slik park for ei tid tilbake. Den gongen fekk dei avslag, men no vert det fart i arbeidet.

– Vi trur at ein slik park kan generere endå meir aktivitet i området, og få fleire til å bevege seg utandørs. Dette er viktig med

tanke på å bidra til god folkehelse, seier Åmås.

Støttar det frivillige Noreg

– Gjensidigestiftelsen gir gjerne store summer til anlegg som er varige og femnar mange. Overskotet frå 200 år med forsikring skal gå til allmenntilgjengelige føremål i det frivillige Noreg, seier Ketil Jarl Halse, som representerer stiftinga. I år har Gjensidigestiftelsen fordelt om lag sju millionar kroner i Møre og Romsdal.

– Det er interessant å sjå skilnaden mellom Vestlandet og Austlandet. Vi får årleg inn svært mange søknadar frå Vestlandet, medan det er merkbart færre frå Austlandet, seier Halse. Han meiner dette vitnar om stor frivillig aktivitet på Vestlandet, og dette er noko Gjensidigestiftelsen har merka seg.



* Då Ketil Jarl Halse dukka opp på Årneset med rause gavesjekkar, vanka det fleire klemmar.

– Vi vil påskjønne dei som er aktive, skaper aktivitet lokalt og organiserer ting for andre, seier han, og håper på like mange søk-

nadar til neste år. Den årlege søknadsfristen er 15. september

LIV JORUNN NYHAGEN

Fekk midlar til tryggleiksutstyr



* Volda rideklubb fekk også positivt svar på søknaden sin. F.v: Magne Holmin, Bjørg Holmin, Edle Holmin, Ida Kristine Standal på Endrar og Ketil Jarl Halse frå Gjensidigestiftelsen.

Volda rideklubb vart òg tildelt midlar frå Gjensidigestiftelsen onsdag.

Rideklubben hadde søkt om 32.918 kroner til innkjøp av tryggleiksutstyr for barn, og anna materiell som er nyttig å ha i ei opplæringsfase. Rideklubben har årleg fleire kurs for barn og unge, og stiller opp på ulike arrangement. Då kjem slikt utstyr godt med.

Intensiverer rekrutteringsarbeidet

– No får vi kjøpt alt vi treng til neste års ridekurs, seier klubbleiar

Edle Holmin nøgd, og viser til at det skal kjøpast inn tryggleiksvestar, justerbare ridehjelmar, refleksvestar, voltigeutstyr og kjelegler som skal nyttast i rideundervisninga. Rideklubben feirar 20 år i 2016, og frå nyttår har klubben planer om å intensivere rekrutteringsarbeidet. Det er mellom anna planlagt å arrangere fleire ridekurs i jubileumsåret. Om lag halvparten av klubben sine medlemmar er i dag under 16 år.

– Vi i Gjensidigestiftelsen ynskjer å påskjønne dei som brukar av fritida si for å skape aktivitetar for andre, slår Ketil Jarl Halse fast.



ØRSTA TRELAST

Tlf.: 700 47 500 – post@orstatrelast.no

orstatrelast.no



byggfag.no